

今已極豈得不為之惕慮哉 上曰變異層疊固不虛生尤自
恐懼豈敢忘之○諫院啓曰濟州牧使任弼亨素有物論堂上
加不宜輕授且廣州五年之間五負繼遞年又凶歉疲弊已極
將不能支迎送之弊雖不如遠道遞代之弊有甚於迎送任弼
亨請改堂上加仍任廣州牧使荅曰濟州牧使近來數遞海外
久曠銓曹以為無可當之人以外任注擬故落黠耳任弼亨雖
有物論非如京職豈不可為乎不允○夜坤方有氣如火○乙
丑 御夕講○諫院啓任弼亨事不允○憲府啓前縣監洪詮
妻所犯極為駭愕遣官推問不如詔獄嚴明况宣傳官從事官
以調兵事相繼下去都監郎官又以造成事將往並此推考官
則本道使命一時紛集弊甚不貲請拿推大明律男女婚姻條
若再許他人已成婚者杖八十女歸於前夫大典禁制條已受
婚書而再許他人成婚者其主婚者論罪離異云而成化十五
年承傳內引大明律此條以為婚書已納背約輒悔是乃主婚者
之過而女歸前夫有乖婦道是豈王政之體乎今後再許他人